

Date – 16/12/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma chuan Tripura atanga Mizorama Gas Pipeline phum mektu Indradhanush Gas Grid Limited (IGGL) Chief Executive Officer Pu Subrata Das leh a thawhpuite chu a Pisa-ah a kawm.
2. Aizawl Traffic SP Pu C Vanlalvena chuan kea kalte tan a him zawk nan leh harsatna a siam loh nan lirthei neitute chu an lirthei hman dan leh dahah fimkhur turin an hriattir.
3. Prime Minister Narendra Modia chuan nimin khan Jordan khawpui Amman a thleng
4. Vawiinah kum 1971-a India leh Pakistan indo hriatengna Vijayt DIwas hman a ni.



CM

Chief Minister Pu Lalduhoma chuan nimin khan Tripura atanga Mizorama Gas Pipeline phum mektu Indradhanush Gas Grid Limited (IGGL) Chief Executive Officer Pu Subrata Das leh a thawhpuite chu a Pisa-ah a kawm a, an hnathawh chinte a sawipui a, an harsatna tawh mekte pawh a ngaihthlaksak a ni.

IGGL thawktute hian he pipe line hi Tripura state Panisagar Receiving Terminal atanga rawn kal tanin Kanhmunah, Zawlnuamah, Kawrthahah, Tuidam leh Darlak paltlangin Mamit bulah a chhuak a. Chuta tangin Lengteah kal zelin Sihhmuiah Receiving Terminal dah tur a ni a. Sihhmu Receiving Terminal atanga Aizawl khawpui chhung Household Connection hi Tripura Natural Gas Corporation Limited ten an thawk thung ang.

Panisagar atanga Sihhmu thleng pipeline hi kilometer 119.5 a thui niin a pipe len zawng hi feet khat bial a ni a. Kum 2027 December thlaa thawh zawh hman an tum a ni a. Tun thlengin welding hma hi zaa 45 an thawk tawh a, a phum hna (lowering) hi zaa 33 an thawk tawh a ni.

He project hi North East Natural Gas Pipeline Grid hnuaia hmalakna niin, Panisagar leh Sihhmu inkar hi phase II hnuaia hmalakna pakhat a ni a. Phase II hmalakna pumpui hian Guwahati – Agartala – Aizawl pipeline a huam a, a vaiin kilometer 723 a thui a ni.



FCI MIZORAM

Food Corporation of India chuan Mizoram chhunga an kudam hrang hrangah buhfai metric tonn 21,269 hralh chhuah tur an kawl mek thu an sawi.

Mizoram a FCI hotuten Akashvani News Aizawl an hrih danin, Mizoram chhung hmun hrang hrang a an kudam-ah buhfai chhek khawl dinhmun a that thu an sawi a, Aizawl kudam-ah buhfai metric tonn 3125. Kolasib kudam-ah metric tonn 3933, Bualpui kudam-ah metric tonn 3213, Lunglei kudam-ah metric tonn 2444, Bairabi kudam-ah metric tonn 4769 bakah Lawngtlai kudam-ah metric tonn 2725 a awm mek thu an sawi.

Food Corporation of India Mizoram Divisional Manager Pu Bankim Phonglo chuan kumin sorkar tangka kum chhunga vawiin December ni 15 thlenga FCI in Mizoram a buhfai a lakuh zat chu metric tonn 77034.43 a tlin tawh thu leh hemi phurh luhna atan hian rail bungraw phurhna rake 39 lai hman a nih thu Akashvani News Aizawl a hrih a ni.



AIZAWL SP

Aizawl Traffic SP Pu C Vanlalvena chuan kea kalte tan a him zawk nan leh harsatna a siam loh nan lirthei neitute chu an lirthei hman dan leh dahah fimkhur turin an hriattir.

SP hian nimin khan thuchhuah siamin, mihring kalna tura ruahman; Footpath-a lirthei khalh emaw, dah/park emaw, kea kalte tana hnawk khawpa Footpath rapa lirthei dah emaw hi The Motor Vehicles Act, 1988 - Section 122-na leh The Motor Vehicles (Driving) Regulations, 2017 - Section 39-na chuan a khap tlat tih a tarlang a, dan bawhchhiate chu The Motor Vehicles Act, 1988 - Section 177-a hrem theih an ni. Chuvangin lirthei khalhtuten Footpath-a lirthei dah lo turin a hriattir a, hei hian rei lo te dah zawk pawh a huam vek a ni.

Footpath-a lirthei dah/park hnawkte chu Traffic Control Room (Ph: 9366553559)-ah an lirthei thlalak, registration number langin; an dahna hmun nen hriattir zel turin a ngen bawk a ni.



FIRE STATISTICS

Mizoram Fire and Emergency Services chhinchhiah danin kumin chhungin Mizoramah In kang 27 a awm.

Fire and Emergency Services hotuten Akashvani News Aizawl an hrih danin, kumin chhunga kang meiin bungrua a tihchhiat zat hlutna chu, cheng nuai zali sawmnga pakua sing kua sang riat za nga leh sawmthum ang a chhut a ni a, kumin chhunga ram kang F&ES hnena report zat chu 162 a tling bawk.

Mizoram Fire and Emergency Services chuan kumin chhungin chhanchhuah hna tum 39 an thawk bawk a, hei bakah hian kumin chhunga kangmei avanga nunna chan mi pakat a awm thu an sawi bawk.

Mizoram Fire and Emergency Services hotute chuan mitin te kangmei laka fimkhur tur leh electric connection bakah gas connection put ru a awm leh awm loh chungh tinte enchiang thin tura an duh thu sawiin, ram lamah pawh nihlei thiltih avanga hnah ro hal mai mai pawhin kangmei nasa tak a thlen theih thu an sawi a, hemi kawngah hian mitin te fimkhur tur leh kangmei chhuakin pawh nasa tak a thlen thin tih hria a, kangmei chhuak tur pumpleh na atan mitin te tan la tura an duh thu an sawi.

<><><>

DOG REGULATIONS

Nimin khan Kolasib khaw chungha vengtin a Ui khuarkhirh chungchang chu DC Conference Hall-ah sawi ho a ni a. He hun hi SDO(S) Pu H. Lalramliana chuan a kaihhruai.

Pu H. Lalramliana, SDO (S) chuan Kolasib khawpui chungha Ui khuahkhirh kalpui mek a nih thu a tarlang a. Mihringin ran kan ngaihnat ber chu Ui a ni, tiin, chutih rualin khuahkhirh ngai tak zing a mi a nih thu a sawi a. Khuahkhirh that loh chuan vantlang mipuite tana hnawksak leh Ui seh avanga ramtuilei lo a awm theih a nih thu a sawi. Veng ti tawp tu leh an zun leh ek in faina kawngah harsatna min thlen thei tu a nih thu sawiin, khuahkhirh loh chuan vantlang tan a him lo a ni a ti a. Chuvangin, mipui kan him tlan zel theih na turin Ui khuahkhirh hi a tul tak zet a ni, a ti bawh.

He hunah hian hun hmasa lama Ui chhuak khuahkhirh dan tur thlirletna hun hman a ni a. Vengtin a VC te leh YMA hruaitute hnen atangin Ui chhuak khuahkhirh chungchanga an hmalak dan report ngaihthlak a ni a. Khawlai a Ui thahnem tak man a nih tawh thu ngaihthlak niin Ui chhuak neitute pawh pawisa chawi tir zel a nih thu tarlan a ni a. Ngawrh leh zual a khawlai a Ui chhuak vil zui zel dan sawiho nghal a ni. A theih chin chinah Police lam te nena a tangkawpin Ui chhuak vil zui zel dan tur chungchang sawi ho a ni bawh.

He hunah hian sorkar mi pawimawh te, Kolasib khawpui huamchungha Village Council memberte leh YMA hruaitute an tel a ni.

<><><>

OPEN GYM

Mipui a duh apiang hman theih turin 225 Bn CRPF te chuan Zemabawk-a YMA Jubilee Park-ah Open Gym an bun thar.

Jubilee Open Gym tia hming vuah hi tun hnai khan Zemabawk Branch YMA President Pu Zorammuana chuan a hawng a. He Gym-ah hian taksa sawizawina hmanrua chi hrang hrang 8 – Air Walker, Air Swing, Push Chair, Elliptical Cross Trainer, Arm and Paddle Bike, Sit Up Board, Waist Twister, leh Arm Wheel te dah a ni a. Heng hmanruate hi naupang, thalai leh puitling, upa thlenga hman theih tura duan a ni.

Jubilee Open Gym hawannaah hian YMA Zemabawk Branch hotute bakah 225 Bn CRPF aiawha officer-te leh sipaite an tel a. YMA President chuan 225 Bn CRPF te chungah lawmthu sawiin, CRPF hotute chu nakin zelah pawh Mizo mipui chawikanna leh an tana rawngbawlina kawngah theihtawpa tan la zel turin a sawm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan nimin khan Jordan khawpui Amman a thleng a. Jordan Prime Minister Dr.Jafar Hassan chuan airport ah alo hmuak a ni. Prime Minister Modia chuan Pu Jafar Hassana'n a lo dawnsawn danah lawmthu sawiin ni hnih a cham chhungin India leh Jordan inkara thawhdunna chuan hma a sawn belh ngei a beisei thu social media lamah a tarlang a ni. Pu Modia chuan India leh Jordan te chuan khawvel thatna turii theihtawp an chhuah dawn tih a sawi bawk a. Amman-a India mipuiten an lo dawnsawn danah lawmthu a sawi bawk a ni. Nizan khan Prime Minister Modia hian Presidential Palace ah King Abdullah II bin Al Hussein nen an inkawm nghal a ni.

Puan tawh angina Prime Minister Narendra Modia chuan nimin khan ram pathum Jordan, Ethiopia leh Oman tlawh turin a zin chhuak a. A zin thawhkhatnaah hian Jordan tlawh a hmasa ber a. Tun tuma Prime Minister Modia'n Jordan a tlawh hun hi India leh Jordan thawhdunna kum 75 na champha nen a innang chiah a ni.

Jordan a tlawh zawh hian PM Modia hian Ethiopia a pan leh dawn a. Ethiopia ram hruaitute nen India leh Ethiopia inkara thawhdunna hrang hrangte an sawidun dawn a. A hnukung berah Oman tlawh lehin Sultan Haitham ibn Tarik nen an inhmu ang a. Tun tum hi Oman leh India thawhdunna in kum 70 a tlinna tur chiah a ni bawk ang.

<><><>

VIJAY DIWAS

Vawiinah kum 1971-a India leh Pakistan indo hriatengna Vijayt DIwas hman a ni. Kumtin vawiin angah hian India in Pakistan a hnehna hriatreng nan leh kha indonaa sipai ram tana nunna hlan te hriatrengna hman a ni a. Ramchung mipuiten he ni ah hian sipaite huaisenna leh chhuanawm zia an hre thar leh thin a ni. Kum 1971 vawiin ni ah hian Pakistan General AA Khan Niazi leh sipai sing 9 leh sang 3 chuangte chu India sipaite kutah an inpe a. Indo tihtawp anih rualin Bangladesh ram a hranin a ding zui ve nghal a ni.

<><><>